



JUDICIAL SYSTEM MONITORING PROGRAMME  
PROGRAMA MONITORIZASAUN BA SISTEMA JUDISIÁRIU

**Sumáriu Kazu**  
**Tribunál Distritál Dili**  
**Agostu 2020**

**Afirmasaun:** Sumáriu Kazu tuir mai ne'e deskreve faktu sira no prosesu iha Tribunál tuir JSMP nia monitorizasaun independente, no deklarasaun ne'ebé parte sira fó iha Tribunál nia laran. Informasaun ne'e la representa JSMP nia hanoin hanesan instituisaun ida.

**JSMP** kondena maka'as forma violénsia hotu-hotu, liuliu hasoru fetu no ema vulneravel. JSMP afirma laiha justifikasaun ba kualkér violénsia hasoru fetu.

**A. Sumáriu prosesu julgamentu kazu iha Tribunál Distritál Dili**

**1. Totál kazu ne'ebé JSMP monitoriza: 15**

Artigu	Tipu kazu	Númeru
Artigu 177 Kódigu Penál (KP)	Abuzu seksuál ba menór	3
Artigu 177, 182 KP	Abuzu seksuál ba menór ho agravasaun	1
Artigu 172, 173 KP	Violasaun seksuál agravasaun	1
Artigu 154 KP	Maus-tratus ba kónjuje	1
Artigu 171 KP	Koasaun seksuál	1
Artigu 178 KP	Aktu seksuál ho adolexente	1
Artigu 176 KP	Prostituisaun infantíl	1
Artigu 139, 23 138 KP no artigu 20 (1) no (2) Lei Nú.5/2017	Omisídiu agravadu, tentativa omisídiu simples no arma brankas	1
Artigu 252 KP	Furtu agravadu	1
Artigu 316 KP	Kontrabandu	1
Artigu 259 KP	Danu agravadu	1

Artigu 274, 295, 304 KP no artigu 7(1), artigu 9(m) husi Lei Nú. 2/2017	Administrasaun danoza, pekulatu no falsifikasaun agravadu no kombate tráfiku no konsumu ilísitu droga	1
		1
<b>Totál</b>		<b>15</b>

## 2. Totál desizaun ne'ebé JSMP monitoriza:10

Tipu pena	Artigu sira	Númeru
Pena prizaun	Artigu 66 KP	5
Suspensaun ba prizaun nia ezekusaun	Artigu 68 KP	3
Absolve		2
<b>Totál</b>		<b>10</b>

## 3. Totál kazu sira ne'ebé adia tuir JSMP monitorizasaun: 0

## 4. Totál kazu ne'ebé sei kontinua prosesu tuir JSMP nia monitorizasaun: 5

## B. Deskrisaun sumáriu ba desizaun kazu sira ne'ebé JSMP monitoriza:

### 1. Krime furtu agravadu

Nú. Prosesu : 0110/19 DINFT  
 Kompozisaun Tribunál : Koletivu  
 Juis : Dr. Ivan J. S. P. Antonino Gonçalves, Dra. Ana P. Fonseca no  
 Dra. Maria Solana  
 Prokuradór : Dr. Hipolito Exposto Martins Santa  
 Defeza : Dra. Joana Cristina Pinto  
 Desizaun : Pena prizaun tinan 1 fulan 6 suspende ba tinan 1 fulan 6

Iha 03 Agostu 2020, Tribunál Distrital Dili prezide julgamentu leitura akordaun ba krime furtu agravadu ne'ebé envolve arguida AdS hasoru nia aman, iha Munisípiu Dili.

### Akuzasaun Prokuradór

Prokuradór akuza katak iha 27 Juñu 2019, iha tuku 10:00 dadeer, ema sosa sigaru no pulsa iha lezadu nia kioske no lezadu atu troka osan rahun nune'e lezadu tama ba haree nia pasta tau osan nian ne'ebé lezadu subar iha sumasu okos maibé pasta ne'e ho osan hamutuk montante US\$1,320.00 laiha ona sumasu okos. Ho nune'e lezadu husu ba arguida, maibé arguida ta'uk no nakdedar halai sai husi uma durante kalan rua la fila ba uma. Bainhira arguida fila ba uma arguida fó fali de'it osan restu ho montante US\$7.65, tanba sira seluk arguida gasta hotu ona. Osan sira ne'e lezadu rai atu halo tratamentu ba nia moras no sosa ai-moruk.

Prokuradór akuza arguida kontra artigu 252 nú. 1(a) KP kona-ba furtu agravadu ho moldura penál tinan 2 to'o tinan 8 prizaun.

## **Produsaun ba prova sira**

Iha julgamentu, arguida konfesa katak nia foti duni osan ho montante US\$1,320.00 tanba kuandu husu lezadu sei la fó. Arguida mós deklara katak nia devolve ona osan ho montante US\$700.00 no sei falta US\$620.00. Osan sira restu ne'e, arguida promete sei devolve hotu. Arguida haktuir katak agora daudaun sira di'ak malu ona, arrepende ninia hahalok no promete sei la halo tan iha futuru.

Alende ne'e, lezadu kontinua konfirma faktu sira iha akuzasaun no hatutan katak bainhira arguida husu lezadu sei fó, maibé iha akontesimentu ne'e arguida la husu no foti nonook de'it. Lezadu haktuir katak depoisde arguida fila ba uma mak lezadu ba hato'o keixa. Lezadu mós konfirma arguida nia deklarasaun kona-ba devolve ona osan ho montante US\$700.00 no husu atu arguida tenke devolve fali osan restu montante US\$620.00.

Tribunál presinde la rona ona testemuña ninia depoimentu tanba arguida konfesa faktu hotu iha akuzasaun.

## **Alegasaun finál**

Prokuradór haktuir katak arguida konfesa integralmente ba faktu sira iha akuzasaun no deklara mós katak bainhira nia husu, lezadu sei la fó maibé lezadu dehan katak se arguida husu lezadu sei fó. Kona-ba osan sira ne'e, arguida selu ona balun. Ho nune'e, husu ba tribunál atu haree ba sirkunstánsia sira ne'e antes foti desizaun.

Entretantu parte defeza husu ba tribunál atu aplika pena ne'ebé mak justu no adekuaudu tanba arguida konfesa integralmente.

## **Desizaun**

Tribunál prova katak arguida foti lezadu nia osan ho montante US\$1,320.00. Bazeia ba faktu provadu no tetu sirkunstánsia atenuante sira hanesan arguidu devolve ona osan ho montante US\$700.00 no sei selu osan restu US\$620.00. Alende ne'e, arguida arrepende ona ninia hahalok no di'ak malu ona ho lezadu, nune'e tribunál konklui no kondena arguida ho pena prizaun tinan ida fulan neen suspende ba tinan ida fulan neen no fó tempu ba arguida fulan neen nia laran atu devolve osan restu.

## **2. Krime maus-tratus ba kónjuje**

Nú. Prosesu	: 0640/19 DICMR
Konpozisaun Tribunál	: Koletivu
Juis	: Dra. Albertina Neves, Dra. Ersilia de Jesus no Dr. Evangelino Belo
Prokuradór	: Dr. Nelson de Carvalho
Defeza	: Dr. Rui Mendonça (advogadu privadu)
Desizaun	: Pena prizaun tinan 2 suspende ba tinan 2

Iha 04 Agostu 2020, Tribunal Distrital Dili prezide julgamentu leitura akordaun ba krime maus-tratus ba kónjuje ne'ebé envolve arguidu CAC (ajente PNTL) hasoru nia feen, iha Distritu Dili.

### **Akuzasaun Prokuradór**

Prokuradór akuza katak iha 28 Juñu 2019, iha oras tuku 23:00 kalan, arguidu tuku dala rua iha lezada nia kanuruk no tebe dala rua iha lezada nia kelen parte loos. Aktu sira ne'e, rezulta lezada sofre bubu no moras iha kanuruk no kelen. Antes agresaun ne'e, lezada fila ba uma depoisde partisipa misa simu estatua Na'in Feto iha Gruta Vila-Verde no arguidu ne'ebé ho kondisaun lanu diskute malu ho lezada no komete aktu hirak ne'e hasoru lezada. Ho nune'e, lezada ho nia oan sira muda husi sira nia uma Kaikoli ba fali hela iha Delta 3 (tolu). Problema ida ne'e, lezada la hato'o keixa.

Tuir mai, iha 08 Agostu 2019, iha tuku 00:00 kalan, iha Delta tolu, bainhira lezada ho nia oan sira toba hotu ona, arguidu ba no fanu lezada. Arguidu istori malu ho lezada no rasta lezada nia liman, basa dala ida iha lezada nia hasan parte loos no basa dala ida iha hasan parte karuk. Alende ne'e, arguidu lees lezada nia vestidu. Arguidu nia asaun ne'e rezulta lezada sofre moras iha liman, hasan parte loos no karuk no halo lezada ta'uk. Iha akontesimentu segundu ne'e lezada mós la hato'o keixa.

Depoisde ne'e, iha 16 Novembru 2019, iha oras meiodia, nafatin iha Delta tolu, bainhira lezada fila husi serbisu to'o iha uma, arguidu hein ona lezada no rasta sai lezada husi karreta laran no dada lezada to'o iha baranda no soe sai lezada nia sasan iha karreta laran. Hafoin ne'e, arguidu tuku lezada maibé la kona tanba lezada ses-an tiha. Ho nune'e, arguidu hakbesik-an ba lezada no tuku dala ida iha lezada nia kanuruk halo lezada monu ba rai. Arguidu mós ameasa lezada katak sei tiru mate lezada. Arguidu nia ameasa ne'e halo lezada trauma nune'e lezada ba hato'o keixa.

Prokuradór akuza arguidu kontra artigu 154 KP kona-ba maus-tratus ba kónjuje ho moldura penál tinan 2 to'o tinan 6 prizaun, konjuga ho artigu 2, 3(a), 35(a) no 36 LKVD.

### **Produsaun ba prova sira**

Iha prosesu julgamentu, arguidu konfesa parsialmente ba faktu sira iha akuzasaun katak iha akontesimentu primeiru no segundu arguidu so diskute malu de'it ho lezada no la halo agresaun hasoru lezada. Nune'e mós iha 16 Novembru, arguidu deklara katak nia la tuku lezada maibé bainhira sira diskute malu, lezada ka'er arguidu nia liman nune'e arguidu liki nia liman mak kona lezada nia kanuruk. Arguidu mós deklara katak nia istori malu bebeik ho lezada tanba toman lezada *facebook* ho mane seluk.

Enkuantu, lezada kontinua konfirma faktu sira iha akuzasaun prokuradór nian no konfirma mós ho arguidu ninia deklarasaun kona-ba *facebook* ho mane seluk, maibé mane refere lezada rasik la koñese.

### **Alegasaun finál**

Prokuradór konsidera arguidu provadu komete krime maus-tratus hasoru nia feen. Nune'e, tetu mós sirkunstánsia sira hotu no husu ba tribunal atu kondena arguidu ho pena prizaun tinan tolu suspende ba tinan tolu.

Entretantu defeza husu ba tribunál atu fó pena ne'ebé adekuadu no fó justisa ba arguidu tanba arguidu konfesa parsial ba faktu ne'ebé akontese iha 16 Novembru 2019 no akontesimentu ne'e mós tanba provokasaun mai husi lezada rasik.

### **Desizaun**

Depoizde avalia faktu hotu, tribunál prova katak iha 28 Jullu 2019, iha tuku 23:00 kalan, arguidu tuku dala rua iha lezada nia kanuruk no tebe dala rua iha lezada nia kelen parte loos. Tribunál mós prova katak iha 08 Agostu 2019, iha tuku 00.00 kalan, arguidu fanu lezada no rasta lezada nia liman, basa dala ida iha lezada nia hasan parte loos, basa dala ida iha hasan parte karuk no lees lezada nia vestidu.

Alende ne'e, tribunál prova katak iha 16 Novembru 2019, iha oras meiodia, arguidu rasta sai lezada husi karreta laran no dada lezada to'o iha baranda no soe sai lezada nia sasan iha karreta laran. Alende ne'e, arguidu tuku lezada maibé la kona tanba lezada ses-an tiha. Lezada monu ba rai bainhira arguidu liki nia liman no kona iha lezada nia kanuruk. Arguidu mós ameasa sei tiru mate lezada.

Bazeia ba faktu provadu sira ne'e no tetu sirkunstánsia sira hotu, nune'e tribunál konklui prosesu ne'e no kondena arguidu ho pena prizaun tinan rua suspende ba tinan rua.

### **3. Krime prostituisaun infantíl**

Nú. Prosesu : 0116/19.PCCIC  
Kompozisaun Tribunál : Koletivu  
Juis : Dra. Ana P. Fonseca, Dra. Maria Solana d. C no Dr. Ivan José S. P. A. Gonçalves  
Ministériu Públiku : Dr. Jacinto Babo  
Defeza : Dr. João de Carvalho  
Desizaun : Pena prizaun tinan 8

Iha 10 Agostu 2020, Tribunál Distritál Dili prezide julgamentu leitura akordaun ba krime prostituisaun infantíl ne'ebé envolve arguidu JdS hasoru nia feen ho idade 16, iha Distritu Dili.

### **Akuzasaun Prokuradór**

Prokuradór akuza katak Iha laron ne'ebé la apura maibé iha tinan 2019, arguidu haruka lezada halo relasaun seksuál ho Sr. A iha arguidu no lezada nia uma no Sr. A selu lezada ho osan US\$110.00. Iha laron hanesan, arguidu mós lori lezada ba halo relasaun seksuál ho Sr. AM iha dolok-oan no Sr. AM fó osan US\$40.00. Alende ne'e, arguidu mós lori lezada ba halo relasaun seksuál ho patraun Bis (Sr. O) iha ótel ida iha Metiaut no Sr. O promete atu fó motor ida no telemovél maibé to'o agora seidak fó. Tuir mai, arguidu mós lori lezada ba ótel hodi halo relasaun seksuál ho katuas ne'ebé bain-bain ema bolu *astuka* no

hetan osan US\$50.00. Arguidu mós haruka lezada ba buka ema katuas sira ne'ebé iha osan hodi hala'o relasaun seksuál atu bele sustenta sira nia moris lor-loron. Osan sira ne'ebé lezada hetan fó ba arguidu mak ka'er no bainhira lezada fila la lori osan arguidu baku lezada. Arguidu no lezada moris hanesan feen ho la'en iha fulan Agostu 2019.

Prokuradór akuza arguidu kontra artigu 175 alinea (1) KP kona-ba prostituisaun infantíl ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

### **Produsaun ba prova sira**

Iha prosesu julgamentu, arguidu konfesa faktu hotu iha akuzasaun no deklarata katak arrepende ninia hahalok. Arguidu mós deklarata katak depoisde akontesimentu ne'e lezada ninia família hatene arguidu faan ninia feen ba kaben na'in astuka sira, nune'e lezada nia inan-aman ba foti kedas lezada. Agora dadaun arguidu no lezada separa ona no lezada hela hamutuk ho nia inan-aman sira.

Tribunál deside la rona ona deklarasaun lezada nian tanba arguidu konfesa integralmente ba faktu hotu iha akuzasaun.

### **Alegasaun finál**

Prokuradór konsidera arguidu nia hahalok ne'e prenze duni elementu sira husi krime prostituisaun infantíl. Prokuradór reforsa liutan katak tuir loloos arguidu tenke proteze lezada tanba hanesan ninia feen. Alende ne'e, husu ba tribunál atu altera medida koasaun husi TIR ba prizaun preventiva tanba arguidu ema ne'ebé sempre iha kontaktu ho mane kaben-na'in sira ka *astuka*. Bazeia ba konsiderasaun sira ne'e, husu ba tribunál atu kondena arguidu ho pena prizaun tinan ualu.

Entretantu, defeza konsidera arguidu konfesa faktu sira iha akuzasaun, arrepende ona ninia hahalok no promete ba tribunál katak sei la repete tan hahalok hanesan iha futuro. Tanba ne'e, husu ba tribunál atu aplika pena ne'ebé justu no kmaan ba arguidu.

### **Desizaun**

Depoisde avalia faktu hotu, tribunál prova katak arguidu haruka lezada halo relasaun seksuál ho Sr. A iha arguidu ho lezada nia uma no Sr. A selu lezada ho osan US\$110.00. Arguidu lori lezada ba halo relasaun seksuál ho Sr. AM iha Dolok-oan no Sr. AM fó osan US\$40.00. Arguidu mós lori lezada ba halo relasaun seksuál ho Sr. O iha ótel ida iha Metiaut no Sr. O promete atu fó motor ida no telemovel maibé to'o agora seidak fó. Alende ne'e, arguidu lori lezada ba ótel hodi halo relasaun seksuál ho katuas bain-bain ema bolu *astuka* no hetan osan US\$50.00. Arguidu mós haruka lezada ba buka ema katuas sira ne'ebé iha osan hodi halo relasaun seksuál. Osan sira ne'ebé ema selu ba lezada ne'e, arguidu mak ka'er no bainhira lezada fila la lori osan arguidu baku lezada.

Bazeia ba faktu provadu sira no tetu mós ho sirkunstánsia atenuante sira hanesan arguidu konfesa faktu sira, arrepende ona ninia hahalok no promete la repete iha futuro, ho nune'e tribunál konklui prosesu ne'e no kondena arguidu ho pena prizaun tinan ualu.

#### **4. Krime kontrabandu**

Nú. Prosesu : 0031/18 LIMBER  
Kompozisaun Tribunál : Koletivu  
Juis : Dr. João Ribeiro, Dra. Zulmira Auxiliadora Barros no Dr. Argentino Luísa Nunes  
Prokuradór : Dr. Matias Soares  
Defeza : Dr. José da Silva  
Desizaun : Absolve

Iha 11 Agostu 2020, Tribunál Distrital Dili prezide julgamentu leitura akordaun ba krime kontrabandu ne'ebé envolve arguidu Ananias Pereira no arguida Saturnina do Carmo nu'udar feen ho la'en hasoru Estadu RDTL, iha Distritu Likisá.

#### **Akuzasaun Prokuradór**

Prokuradór akuza katak iha 09 Outubru 2018, maizumenus iha tuku 23:00 kalan, ekipa PNTL Unidade Patrulla Fronteira (UPF) ne'ebé lidera husi Sarjentu Jeraldo Soares desloka ba iha Aldeia Dair, Suku Gugleur, Sub-distritu Maubara, Distritu Likisá tanba simu informasaun husi polísia intelejen sira katak iha comunidade balun halo tranzasaun mina-rai iha fatin refere. Bainhira ekipa PNTL to'o iha fatin refere, arguidu Ananias ho arguida Saturnina halai sees tiha ona husi fatin ne'e, maibé mina-rai sira arguidu no arguida subar hela iha rai ko'ak ida besik iha tasi-ibun no taka metin ho aitahan. Ho nune'e, ekipa polísia UPF sira hetan no prende tiha mina-rai sira ne'e.

Mina-rai sira ne'e hamutuk jerigen 76 ne'ebé kompostu husi jerigen litru 35 hamutuk 64 no jerigen litru 20 hamutuk 12. Arguidu no arguida sosa mina-rai refere husi ema ne'ebé mak antes ne'e arguidu sira kontaktu ona no tula husi bero mai hatun iha tasi-ibun Dair nian. Tanba bero nia kapasidade ki'ik, mina- rai sira ne'e tula dala rua. Ba dala-uluk tula bidón lima no tuir mai tula bidón lima. Arguida no arguidu sosa kada bidón ida ho folin US\$140.00, nune'e bidón sanulu arguida no arguidu sosa ho folin US\$1,400.00. Arguidu ho arguida sosa mina-rai sira ne'e ho objetivu atu lori ba faan iha Merkadu Likisá no Maubara.

Prokuradór akuza arguidu no arguida kontra artigu 316 nú. 1 KP kona-ba kontrabandu ho moldura penál tinan 2 to'o tinan 6 ka multa no kontra artigu 30 nú. 2 KP kona-ba autoria.

#### **Produsaun ba prova sira**

Iha prosesu julgamentu, arguidu Ananias rekoñese katak arguidu ho arguida tau osan hamutuk hodi sosa mina-rai iha Dair maibé arguidu la kontaktu antes ba ema ne'ebé faan no arguidu mós la koñese ema ne'e. Ema ne'e mak apresenta-an katak mai husi Palaka no dehan ba arguidu katak nia faan mina-rai, nune'e mak arguidu ho arguida sosa. Arguidu mós deklarata katak kada bidón ho folin US\$140.00 no total US\$1.400.00 tanba selu mós ho ema ne'ebé lalin mina-rai ne'e. Arguidu hatutan katak distánsia entre arguidu nia uma no fatin sosa mina-rai ne'e ladun dook, arguidu laiha lisensa. Mezmu nune'e, arguidu deklarata katak arrepende ninia hahalok ne'e no foin primeiravés mai hatan iha tribunál. Enkuantu arguida Saturnina do Carmo hili direitu nonook.

Testemuña Virgilio da Conceição Madeira hanesan membru PNTL iha Distritu Likisá depoimenta katak iha momentu ne'ebá testemuña hetan orden husi nia superiór atu ba iha fatin akontesimentu nune'e testemuña mós ba iha ne'ebá no hetan mina-rai iha jerigen maibé testemuña la lembra jerigen hira. Testemuña mós la hetan arguidu no arguida iha fatin akontesimentu no testemuña mós la hatene se mak na'in ba mina-rai ne'e.

Testemuña Arlindo Freitas hanesan membru PNTL iha seksaun informasaun, iha Distritu Likisá depoimenta katak testemuña simu orden husi komandante, nune'e testemuña ba iha fatin akontesimentu. Iha ne'ebá testemuña haree mina-rai iha jerigen hamutuk litru 35 no litru 20. Ho nune'e testemuña sira prende tiha sasan sira ne'e maibé testemuña la hatene se mak na'in ba mina-rai refere no to'o mai ona tribunál mak testemuña foin hatene katak arguidu no arguida mak na'in ba mina-rai ne'e. Testemuña haktuir katak depoisde prende tiha mina-rai refere, testemuña ba tau iha Komandu Distritu Likisá no entrega ba iha polísia investigasaun Likisá.

Testemuña Vasco Amaral hanesan ajente polísia iha Distritu Likisá depoimenta katak antes ne'e testemuña koñese arguidu no arguida no konsidera hanesan família maibé laiha relasaun ran. Iha altura ne'ebá testemuña iha unidade *taks force* no simu orden husi komandante nune'e testemuña ba iha fatin akontesimentu no iha ne'ebá testemuña haree mina-rai iha masa barak kuaze bidón sanulu. Ho nune'e, testemuña hamutuk ho kolega sira lori hotu mina-rai sira ne'e mai iha komandu no entrega ba iha polísia investigasaun. Testemuña mós depoimenta katak nia koñese arguidu no arguida tanba antes akontesimentu dalaruma testemuña hasoru malu ho arguidu no arguida maibé testemuña la hatene mina-rai sira ne'e na'in husi arguidu no arguida. Testemuña hatutan katak nia foin primeiravés prende mina-rai iha fatin akontesimentu.

Tribunál presinde la rona ona testemuña seluk ninia depoimentu tanba tribunál haree katak testemuña sira ne'e nia depoimentu perante prokuradór kuaze hanesan ho testemuña sira seluk ne'ebé tribunál rona ona.

### **Alegasaun finál**

Prokuradór haktuir katak polísia hetan informasaun husi polísia inteljen ne'ebé detekta katak arguidu na'in rua guarda mina-rai jerigen 76 no tau iha bidón. Arguidu no arguida sosa mina-rai iha fatin ne'ebé la'os autorizadu husi autoridade lokál. Alende ne'e, arguidu la hatene ema ne'ebé faan mina-rai maibé dehan mai husi Palaka. Prokuradór haree iha serteza katak sasan ilegál, fatin la'os tranzasaun nian no arguidu sira nia uma mós besik iha fatin ne'e. Ho nune'e, arguidu sira ninia hahalok preense duni elementu krime ida ne'e nian no atu halo prevensaun ba aktu hanesan ne'e husi Maubara to'o Batugede, no tetu mós ba arguidu ho arguida nia ekonomikamente, husu ba tribunál atu kondena arguidu no arguida ho pena prizaun tinan tolu suspende nia ezekusaun ba tinan tolu no mós solusita ba tribunál atu mina-rai ne'ebé prende afavor ba Estadu.

Entretantu parte defeza husu ba tribunál atu absolve arguida no arguidu husi prosesu ne'e tanba depoisde rona tiha arguidu no testemuña sira nia deklarasaun arguidu la halo negósiu ilegál. Kontrabandu katak negósiu ne'ebé ultrapasa liuhusi fronteira no fó prezuiju ba Estadu



maibé ba kazu ida ne'e, ema husi Palaka mak mai halo negósiu iha parte Maubara no negósiu ne'e sirkula iha rai laran nune'e konsidera arguidu no arguida la provadu komete krime kontrabandu.

## **Desizaun**

Depoisde avalia faktu sira ne'ebé prodús durante julgamentu, tribunál intende katak arguida no arguidu nia aktu ne'e la prenze elementu sira husi krime kontrabandu tanba laiha aktu importasaun no esportasaun. Maski akontese sosa mina-rai duni husi ema deskoñesidu ne'ebé mai husi Palaka maibé tranzasaun ne'e realiza iha teritóriu Timor laran nune'e tribunál decide absolve arguida no arguidu husi instánsia no mós sei devolve fali arguidu no lezada nia objetu mezmú objetu sira ne'e faan tiha no nia presu ho montante US\$1.704.00.

### **5. Krime aktu seksuál ho adolexente**

Nú. Prosesu : 0443/18.PDDIL  
Kompozisaun Tribunál : Singulár  
Juis : Dra. Ersilia de Jesus  
Ministériu Públiku : Dr. Jacinto Babo  
Defeza : Dr. Jonas Henrique  
Desizaun : Absolve

Iha 11 Agostu 2020, Tribunál Distritál Dili prezide julgamentu leitura akordaun ba krime aktu seksuál ho adolexente ne'ebé envolve arguidu JM hasoru lezada, iha Munisípiu Dili.

### **Akuzasaun Prokuradór**

Prokuradór akuza katak arguidu koñese lezada liuhusi *facebook (fb)* no husi *fb* ne'e sira konverse no hakarak hasoru malu. Lezada hakarak hasoru-malu ho arguidu tanba hakarak la'o halimar ba Jardín Motael. Iha 11 Agostu 2018, iha tuku 13:00 meuidia, arguidu ho motorizada marka Honda Beat kór metan ba tula lezada iha lezada ninia hela fatin besik Eskola Canosa nia oin. Depoisde tula tiha lezada, arguidu lori lezada liuhusi Elemloi nia oin no kurva ba iha área Komoro nian nune'e lezada husu ba arguidu "*nusa mak ita la ba Motael, maibé ita ba fali área Komoro nian?*". Arguidu hatan ba lezada dehan "*ita na'in rua ba tu'ur halimar iha Tasi Tolu de'it*". Bainhira to'o iha areá Tasi Tolu nian, arguidu la hapara nia motorizada maibé kontinua to'o iha Munisípiu Likisá besik tasi-ibun. Iha ne'ebá arguidu no lezada ba tu'ur besik tasi-ibun no arguidu komesa hako'ak metin lezada, haruka lezada toba iha fatuk leten no haruka mós lezada atu hasai nia roupa, maibé tanba lezada lakohi nune'e arguidu mak hasai lezada nia roupa. Arguidu mós hasai nia roupa no halo relasaun seksuál ho lezada. Depoisde halo tiha relasaun seksuál, arguidu tula fali lezada no hatun iha lezada iha nia uma.

Iha loron tuir mai, arguidu ho lezada mantein halo komunikasaun liuhusi *fb* no konkorda malu atu la'o pasiar iha Dili laran, nune'e iha 12 Agostu 2018, iha tuku 13:00 meuidia, arguidu lori motorizada ba tula lezada iha nia uma no sira na'in rua la'o pasiar ba to'o Dolok-oan. Bainhira to'o iha Dolok-oan, lezada dehan ba arguidu katak nia menstruasaun la mai ona. Rona lezada koa'lia nune'e arguidu hatan katak nia sei responsavel ba labarik ne'e no sira kontinua halo tan relasaun seksuál.

Prokuradór akuza arguidu kontra artigu 178 KP kona-ba aktu seksuál ho adolexente ho moldura penál to'o tinan 5 prizaun.

### **Produsaun ba prova sira**

Iha prosesu julgamentu, arguidu konfesa parsialmente ba faktu sira iha akuzasaun prokuradór nian katak sira koñese malu duni liuhusi *fb*, sempre konverse liuhusi *fb* no kombina malu hodi hasoru malu inklui halo relasaun seksuál. Arguidu konfesa katak halo duni relasaun seksuál ho lezada iha tasi-ibun Likisá nian maibé arguidu rejenta halo relasaun seksuál iha Dolok-oan tanba momentu ne'ebá loro manas no ema mós barak. Arguidu deklara liutan katak iha Dolok-oan lezada dehan duni ba arguidu katak depoisde akontesimentu iha Likisá halo nia isin-rua maibé arguidu la dehan ba lezada atu responsabilidade ba labarik ne'e tanba arguidu hatene katak ne'e laos nia oan. Arguidu hatutan katak sira halo duni relasaun seksuál iha kalan ne'e (iha Likisá) maibé arguidu la hatama ninia esperma ba iha lezada ninia orgaun seksuál no iha momentu ne'ebá depoisde halo tiha relasaun seksuál arguidu mós husu ba lezada kona-ba lezada nia esperénsia relasaun seksuál ho ema seluk no lezada hatan katak antes ne'e halo ona relasaun ho ninia namoradu.

Entretantu lezada kontinua konfirma faktu hotu iha akuzasaun no deklara katak antes ne'e namora ona ho ema seluk no maski sempre hasoru malu maibé nunka halo relasaun seksuál. Lezada mós deklara katak nia hatene halo relasaun seksuál bainhira hamutuk ho nia kolega sira *nonton video porno*.

### **Alegasaun finál**

Prokuradór konsidera arguidu provadu komete krime aktu seksuál ho adolexente hasoru lezada, mezmú iha produsaun ba prova arguidu deklara katak relasaun seksuál ne'e akontese dala ida de'it, maibé lezada konfirma faktu hotu iha akuzasaun. Tanba ne'e, husu ba tribunál atu kondena arguidu tuir konviksaun tribunál nian.

Enkuantu defeza husu ba tribunál atu absolve arguidu husi krime ne'e tanba hahalok arguidu nian ne'e la prenze rekezitu sira husi krime violasaun seksuál ho adolexente. Defeza bazeia ba deklarasaun arguidu nian ne'ebé hateten katak antes lezada halo relasaun seksuál ho arguidu lezada halo ona relasaun seksuál ho nia namoradu.

### **Desizaun**

Depoisde avalia faktu sira ne'ebé prodús durante julgamentu, tribunál prova katak arguidu tula lezada ba iha tasi-ibun Likisá no iha ne'ebá arguidu haruka lezada toba iha fatuk leten, arguidu kolu lezada nia rounpa no halo relasaun seksuál ho lezada. Iha liron tuir, arguidu no lezada ba iha Dolok-oan no iha ne'ebá lezada informa ba arguidu katak nia menstruasaun la mai ona no arguidu hatan katak nia sei responsavel, nune'e sira halo tan relasaun seksuál.

Bazeia ba faktu provadu sira ne'e no tetu sirkunstánsia sira hotu, tribunál absolve arguidu husi akuzasaun prokuradór nian ho konsiderasaun katak relasaun seksuál ne'e akontese

tanba hakarak no hakarak nune'e la preense elementu husi krime aktu seksuál ho adolexente. Alende ne'e, antes ne'e lezada halo ona relasaun seksuál ho ninia namoradu.

## **6. Kazu violasaun seksuál ho agravasaun**

Nú. Prosesu : 0617/19.DICMR  
Kompozisaun Tribunál : Koletivu  
Juis : Dra. Maria Solana, Dr. Ana Paula Fonseca no Dr. Ivan José S. P. A. Gonçalves  
Prokuradór : Dra. Ivonia Guterres  
Defeza : Dr. Nelson Borges  
Desizaun : Pena prizaun tinan 12

Iha 13 Agostu 2020, Tribunál Distritál Dili prezide julgamentu leitura akordaun ba krime violasaun seksuál ho agravasaun ne'ebé envolve arguidu AG hasoru lezada MdJ nu'udár arguidu nia inan-boot ho idade tinan 69, iha Munisípiu Dili.

### **Akuzasaun Prokuradór**

Prokuradór akuza katak iha 04 Novembru 2019, arguidu husu osan US\$20.00 ba nia feen hodi sosa tua ho marka *Jim Beam*. Tua ne'e arguidu hemu hamutuk ho arguidu nia primu na'in rua inklui lezada iha lezada nia uma. Depoizde hemu hotu tiha tua ne'e, arguidu ba hola tan serveza lata rua maibé lezada lakohi ona hemu tanba sente lanu todan ona nune'e lezada ba toba tiha. Enkuantu arguidu kontinua hemu ho nia primu na'in rua. Bainhira hemu hotu tiha, arguidu hakat ba lezada nia kuartu no foti sa'e lezada nia lipa no toba iha lezada nia leten.

Lezada ne'ebé dukur hela hakfodak maibé arguidu taka metin lezada niaibun no dehan ba lezada katak "*nonook tanba hau atu halo buat di'ak ida ba ó*". Depoizde koa'lia tiha nune'e arguidu kolu nia rupa no obriga halo relasaun seksuál ho lezada. Mezmu lezada lakohi no sente moras iha nia orgaun seksuál maibé arguidu kontinua ninia hahalok ne'e rezulta lezada sofre raan barak.

Arguidu nia feen haree arguidu laiha nune'e arguidu nia feen tama ba uma laran no rona barullu uituan iha lezada nia kuartu laran. Arguidu nia feen tuku odamatan ho maka'as no arguidu loke odamatan no la'o sai husi kuartu-laran. Enkuantu lezada toba iha rai ho kondisaun raan fakar barak iha semente leten no lezada nia lipa. Arguidu nia feen ho nia primu telefone kedas ba polísia no polísia mai kaptura kedas arguidu. Família sira lori lezada ba halo kedan tratamentu iha ospítal. Durante ne'e arguidu no nia feen hela ho lezada.

Prokuradór akuza arguidu kontra artigu 172 KP kona-ba violasaun seksuál no artigu 173 alinea (a) KP kona-ba agravasaun ho moldura penál tinan 5 to'o tinan 20 prizaun.

### **Produsaun ba prova sira**

Iha prosesu julgamentu, arguidu konfesa faktu hotu iha akuzasaun no deklara katak arguidu la buti lezada niaibun maibé lezada mak ka'er arguidu nia liman hodi haruka halo relasaun seksuál ho lezada. Mezmu nune'e arguidu mós deklara katak arrepende ninia hahalok ne'e.

Entretantu lezada kontinua konfirma faktu hotu iha akuzasaun no rejeita arguidu nia deklarasaun katak lezada mak rasta arguidu nia liman hodi haruka arguidu halo relasaun seksuál ho lezada.

### **Desizaun\***

Depoisde avalia faktu hotu, tribunál prova katak arguidu taka metin lezada niaibun no obriga halo relasaun seksuál ho lezada. Mezmu lezada lakohi no sente moras iha lezada nia orgaun seksuál maibé arguidu kontinua komete ninia hahalok ne'e hodi rezulta raan sai barak. Tribunál prova bazeia ba relatóriu médiku husi Pradet no polisía nia fotografia ba iha lezada nia kondisaun.

Bazeia ba faktu provadu sira ne'e no tetu mós ho sirkunstánsia sira hotu, tribunál halo alterasaun ba kualifikasaun jurídika husi artigu 173 alinea (a) kona-ba agravasaun tanba relasaun família ba fali artigu 173 alinea (c) tanba konsidera ema inkonxiente ka inkapáz tanba idade. Ho nune'e, tribunál kondena arguidu ho pena prizaun tinan 12.

### **7. Krime abuzu seksuál ba menór ho natureza violénsia doméstika**

Nú. Prosesu : 0064/20 PDDIL

Kompozisaun Tribunál : Koletivu

Juis : Dra. Ana P. Fonseca, Dra. Maria Solana no Dr. Ivan José S. Patrocino A. Gonçalves

Prokuradór : Dr. Nelson de Carvalho

Defeza : Dr. Afonso Fatima Gomes

Desizaun : Pena prizaun tinan 25

Iha 17 Agostu 2020, Tribunal Distrital Dili prezide julgamentu leitura akordaun ba krime abuzu seksuál ba menór ne'ebé envolve arguidu LdS hasoru nia oan feto ho idade 12, iha Distritu Dili.

### **Akuzasaun Prokuradór**

Prokuradór akuza katak iha loran no fulan la apura maibé iha tinan 2018, lezada foin fila husi eskola no toba hela iha kuartu laran. Arguidu tama ba iha lezada nia kuartu laran no kolu lezada nia roupa no halo relasaun seksuál ho lezada. Lezada hakfodak hader mai no dehan ba arguidu *"tanbasá apa halo nune'e mai hau?"*. Maibé arguidu ameasa lezada atu labele konta sai ba lezada nia inan se lae arguidu sei baku mate lezada. Arguidu mós fó osan US\$30.00 ba lezada atu labele konta sai akontesimentu ne'e ba ema seluk. Arguidu nia hahalok ne'e rezulta lezada sofre ran no lakon nia virgen. Depoisde akontesimentu ne'e, arguidu kontinua halo relasaun seksuál ho lezada to'o iha tinan 2019.

Tuir mai, iha data no fulan ne'ebé mós la apura maibé iha tinan 2019, bainhira arguidu halo hela relasaun seksuál ho lezada, lezada nia inan toman no hasé arguidu *"nusa mak halo fali hahalok ne'e hasoru ó nia oan ne'ebé tinan barak ó kous no fó han."* Arguidu nia hahalok

---

\* JSMP la monitoriza alegasaun finál ba kazu ne'e.

ne'e, halo lezada hetan moras ran mutin no lezada nia inan mak lori lezada ba konsulta iha ospital no ba apresenta keixa iha polisia.

Prokurador akuza arguidu kontra artigu 177 KP kona-ba abuzu seksuál ba menór ho moldura penál tinan 5 to'o tinan 15 prizaun, artigu 182 alinea (d) KP no konjuga ho artigu 2, 3(c) no 35(b) no 36 LKVD.

### **Produsaun ba prova sira**

Iha prosesu julgamentu, arguidu deklara parsialmente katak halo duni relasaun seksuál ho lezada, maibé dala tolu de'it no la'os halo bebeik. Entretantu lezada kontinua konfirma faktu hotu iha akuzasaun.

Testemuña EM nu'udar lezada nia inan no arguidu nia feen depoimenta katak nia la hatene loran no fulan akontesimentu ne'e maibé iha tinan 2019 testemuña haree ho matan arguidu halo hela relasaun seksuál ho lezada iha kuartu laran. Testemuña depoimenta liutan katak testemuña rona husi lezada katak arguidu halo hahalok ne'e dala barak ona (maizumenus dala 10) hasoru lezada to'o lezada hetan moras ran mutin.

### **Alegasaun finál**

Prokurador konsidera arguidu provadu komete krime abuzu seksuál hasoru nia oan rasik ne'ebé sei idade menoridade. Tanba ne'e, husu ba tribunál atu aplika pena prizaun ba arguidu.

Enkuantu defeza husu ba tribunál atu fó justisa ne'ebé justu ba arguidu.

### **Desizaun**

Depoisde avalia faktu hotu ne'ebé prodús durante julgamentu, tribunál prova katak arguidu tama ba iha lezada nia kuartu laran bainhira lezada toba hela no obriga halo relasaun seksuál ho lezada rezulta ran. Tribunál mós prova katak arguidu mós ameasa sei baku mate lezada kuandu lezada fó hatene akontesimentu ne'e ba nia inan. Alende ne'e, arguidu fó osan US\$30.00 ba lezada atu labele konta sai akontesimentu ne'e ba ema seluk. Arguidu kontinua halo relasaun seksuál ho lezada to'o iha tinan 2019.

Tribunál mós prova katak iha tinan 2019, arguidu komete tan ninia hahalok ne'e no toman husi lezada nia inan. Ho nune'e, lezada nia inan lori lezada ba konsulta iha ospital tanba lezada sofre ran mutin inklui lori lezada ba keixa iha polisia.

Bazeia ba faktu provadu sira ne'e no tetu mós sirkunstánsia hotu-hotu ne'ebé iha, tribunál konklui prosesu ne'e no kondena arguidu ba kada krime ne'ebé nia halo hamutuk dala 10 ho pena prizaun ba kada krime tinan 5 no tribunál akumulula pena sira ne'e ho pena mínimu tinan 5 prizaun no pena másimu tinan 50 prizaun. Bazeia ba akumulasaun pena ne'e, tribunál konklui no kondena arguidu ho pena únika tinan 25 iha prizaun.

## **8. Krime koasaun seksuál**

Nú. Prosesu : 0043/14 DICMR

Kompozisaun Tribunál : Koletivu  
Juis : Dra. Zulmira M. Auxiliadora, Dr. João Ribeiro no Dr. Argentino  
Luisa Nunes  
Prokuradór : Dr. Jacinto Babo  
Defeza : Dra. Tomazia Umbelina no Dr. Xisto Pedrosa (advogadu  
privadu)  
Desizaun : Pena prizaun tinan 2 suspende ba tinan 2

Iha 17 Agostu 2020, Tribunál Distritál Dili prezide julgamentu leitura akordaun ba krime koasaun seksuál ne'ebé envolve arguidu ZAB hasoru lezada ECC, iha Munisípiu Dili.

### **Akuzasaun Prokuradór**

Prokuradór akuza katak iha 03 Feveireiru 2014, iha tuku 10:00 dadeer, lezada hein hela karreta iha Ministériu Justisa nia oin atu fila ba uma. Arguidu ne'ebé kondús hela taksi para iha lezada nia oin atu tula lezada, maibé lezada lakohi tanba lezada la koñese arguidu. Arguidu nafatin husu atu lezada sae arguidu nia taksi, nune'e lezada sae tuir arguidu nia taksi no tuur iha oin.

Arguidu tula lezada liuhusi Pantai-Kelapa tuir dalan arguidu ka'er lezada nia liman no husu lezada atu halo relasaun seksuál maibé lezada lakohi no lezada dehan ba arguidu katak "*hau iha la'en ona*". Bainhira to'o iha Bebonuk, arguidu la hatun lezada iha nia uma, maibé kontinua tula lezada ba iha dirasaun Tasi Tolu nian tanba ne'e lezada tenta atu loke odamatan taksi nian atu halai sai maibé arguidu ka'er metin lezada nia liman no hadau lezada nia pasta no dehan ba lezada katak ita para iha sorin maibé arguidu la para nia taksi no kontinua tula lezada to'o iha tasi-ibun Tasi Tolu nian. Lezada tenta atu halai maibé arguidu ho tudik ameasa atu oho lezada.

Iha momentu ne'ebá lezada haree mane ida hamrik iha tasi-ibun tanba ne'e lezada hakilar no husu atu ajuda loke odamatan taksi nian. Ema ne'e mós ba loke taksi nia odamatan nune'e lezada aproveita halai ba apresenta keixa iha polísia.

Prokuradór akuza arguidu kontra artigu 171 KP kona-ba koasaun seksuál ho moldura penál tinan 2 to'o tinan 8 prizaun.

### **Produsaun ba prova sira**

Iha prosesu julgamentu, arguidu deklara katak iha akontesimentu ne'e arguidu tula duni lezada iha Edifísiu Ministériu Justisa nia oin maibé la obriga lezada atu sae arguidu nia karreta. Arguidu deklara liutan katak antes ne'e lezada tuur iha kadera kotuk maibé tuir dalan lezada rasik mak muda fatin ba tuur iha kadera oin (iha arguidu nia sorin) tanba antes ne'e sira koñese malu ona. Tuir dalan arguidu husu lezada katak "*ó sei klosan ka hola mane ona?*". Lezada hatan katak nia iha ona la'en. Tanba sira gosta malu nune'e arguidu lori lezada ba iha Tasi Tolu.

Arguidu hatutan katak nia la dehan ba lezada atu halo relasaun seksuál maibé dehan de'it ba lezada katak nia gosta lezada no la ka'er tudik ameasa lezada. Mezmu nune'e, arguidu

deklara katak arrepende ninia hahalok ne'e no problema ne'e sira rezolve ona liuhusi familia no arguidu fo ona osan US\$200 ba lezada.

Entretantu lezada kontinua konfirma faktu sira iha akuzasaun katak tuir dalan arguidu ka'er lezada nia liman no tula ba iha nia kalsa oin no husu lezada atu halo relasaun seksual, maibe lezada lakohi no dehan ba arguidu katak nia iha ona la'en. Nune'e lezada hakilar husu ajuda derrepente ema deskoñesidu ida mak ajuda lezada hodi loke karreta nia odamatan nune'e lezada sai husi karreta no ba apresenta keixa. Lezada mos deklara katak kazu ne'e sira rezolve ona liuhusi familia no arguidu fo ona osan US\$200 ba lezada.

### **Alegasaun final**

Prokurador konsidera katak arguidu provadu komete duni krime koasaun seksual tuir faktu sira iha akuzasaun prokurador nian. Tanba ne'e, husu ba tribunál atu kondena arguidu tuir konviksaun tribunál nian.

Entretantu defeza husu ba tribunál atu aplika suspensaun ba pena prizaun tanba arguidu deklara de'it faktu ne'ebé nia komete no arguidu mos arrepende ona ninia hahalok no kazu ne'e sira rezolve ona tuir familia no arguidu fo sala ona ba lezada ho osan US\$200.00.

### **Desizaun**

Depoide avalia faktu hotu, tribunál prova katak arguidu tula lezada ho nia taksi no tuir dalan arguidu ka'er lezada nia liman no tula ba nia kalsa oin no husu lezada atu halo relasaun seksual. Tribunál mos prova katak momentu to'o iha Bebonuk arguidu la hatun lezada iha nia uma, nune'e lezada atu haksoit maibe arguidu dada lezada nia pasta no kontinua tula lezada to'o iha tasi-ibun Tasi Tolu nian. Lezada hakilar husu ajuda no mane ida mak ajuda loke odamatan taksi nian nune'e lezada konsege sai husi taksi laran no ba apresenta keixa.

Bazeia ba faktu provadu sira ne'e no tetu mos sirkunstansia sira hotu inklui problema ne'e arguidu no lezada rezolve ona tuir dalan familia nian no arguidu fo sala ona ba lezada US\$200.00, nune'e tribunál konklui prosesu ne'e no kondena arguidu ho pena prizaun tinan rua suspende ba tinan rua.

### **9. Krime omisidui agravadu, tentativa omisidui simples no arma brankas**

Nu. Prosesu : 0053/19 LIBZET  
Kompozisaun Tribunál : Koletivu  
Juis : Dra. Edite Palmira, Dr. Ivan Patrocino no Dra. Patricia d. A. Fatima B. M. Xavier  
Prokurador : Dr. Jacinto Babo  
Defeza : Dr. Ismail da Costa (advogadu privadu)  
Desizaun : Pena prizaun tinan 15 to'o 27

Iha 21 Agostu 2020, Tribunál Distritál Dili prezide julgamentu leitura akordaun ba krime omisidui agravadu, tentativa omisidui simples no armas brankas ne'ebé envolve arguidu Silverio de Deus, David da Conceição, Jaimito da Conceição, Leandro da Conceição, arguidu Dulcia Andrade, Caetano Martins, Eguido da Costa Mendonça no José da Costa

hasoru lezadu Joni Gonçalves, Nilton Gonçalves, Germino Correia, Herminio dos Santos Bernardo no Adelino Xavier Correia, iha Munisípiu Likisá.

### **Akuzasaun Prokuradór**

Prokuradór akuza katak iha 04 Jullu 2019, iha tuku 16:00 lokraik, lezadu Joni loke *bola guling* iha Merkadu Leorema no momentu atividade *bola guling* ne'e la'o hela, lezadu Joni istori malu ho ema ne'ebé taka *bola guling*. Ho nune'e, arguidu Silverio ho tudik sona dala ida iha lezadu Joni nia kotuk laran rezulta ran sai barak no halo lezadu monu ba iha rai. Momentu lezadu Joni monu hela iha rai ne'e, arguidu sira seluk ho fatuk tuda lezadu no lori besi baku iha lezadu nia ulun no isin-lolon. Arguidu sira ninia hahalok ne'e, rezulta lezadu Joni mate iha fatin akontesimentu.

Lezadu nia alin mane ka lezadu Nilton halai ba atu salva lezadu Joni maibé arguida Dulcia husi kotuk hako'ak metin lezadu Nilton nune'e arguidu David, arguidu Jaimito no arguidu Leandro tuku lisuk lezadu no hodi besi kanu baku iha lezadu nia isin-lolon no arguidu Jaimito ho tudik sona iha lezadu Nilton nia sorin karuk halo ran sai barak no rezulta lezadu Nilton mate iha fatin akontesimentu. Hafoin baku no sona mate lezadu Joni no Nilton, arguidu Caetano sona tan lezadu Jeronimo nia liman parte loos no arguidu Silverio husi kotuk sona mós lezadu Jeronimo nia kotuk laran rezulta kanek iha nia liman no kotuk laran.

Arguidu Caetano no Leandro, sama lezadu Adelino ba iha rai no arguidu Silverio sona lezadu Adelino nia kotuk laran rezulta kanek no ran sai barak husi lezadu nia kotuk laran.

Entretantu arguidu Leandro, tuku lezadu Herminio nia matan-fukun no arguidu Jaimito tuku iha lezadu Herminio nia ibun laran rezulta kanek iha matan-fukun no ibun. Arguidu Eguido tuda fatuk no kona iha lezadu Herminio nia kotuk laran no arguidu David tuda fatuk kona iha lezadu nia kabun. Aktu sira ne'e rezulta lezadu sofre bubu no kanek iha kotuk laran no kabun. Lezadu baixa iha óspital durante fulan ida.

Arguidu Leandro, tuku dala ida iha lezadu Herminio nia matan-fukun, arguidu Jaimito tuku dala ida iha lezadu nia ibun, arguidu David tuda fatuk no kona iha lezadu nia kotuk laran no arguidu Caetano tuda fatuk no kona iha lezadu nia kabun. Aktu sira ne'e rezulta lezadu sofre kanek iha matan-fukun, ibun no bubu iha kotuk laran no kabun.

Prokuradór akuza arguidu sira kontra artigu 139 KP kona-ba omisídiu agravadu ho moldura penál tinan tinan 12 to'o tinan 25 KP, kontra artigu 138 KP kona-ba omisídiu simples ho moldura penál tinan 8 to'o tinan 20 prizaun, kontra artigu 23 KP kona-ba tentativa no konjuga ho artigu 20 (1) no (2) Lei Nú.5/2017 kona-ba arma brankas.

### **Produsaun ba prova sira**

Arguidu Silverio deklara katak nia mesak mak sona lezadu sira. Arguidu mós deklara katak nia la hatene arguidu sira seluk nia envolvimentu iha kazu ne'e, hanesan sona ka baku lisuk lezadu sira tanba altura ne'ebá ema barak loos. Arguidu hatutan katak nia sona lezadu sira tanba bainhira arguidu faan hela sate iha merkadu, lezadu sira ho grupu ba tuda arguidu no kona iha arguidu nia kanuruk nune'e arguidu lori tudik no sona lezadu sira.



Arguidu David da Conceição deklara katak nia la hatene kona-ba akontesimentu ne'e no la hatene tanbasa maka lezadu Joni Gonçalves no Nilton Gonçalves mate. Arguidu mós deklara katak nia kesi hela manu iha fatin fan manu nian iha merkadu laran no arguidu rona ema hakilar malu iha merkadu laran. Arguidu hatutan katak nia hetan tuda iha parte ulun rezulta kanek no halo arguidu dezmaia (*lakon konxiénsia*) no momentu arguidu desmaia hela, arguidu Jaimito mak lori arguidu David ba subar besik iha arguidu Jaimito nia uma. Nia esklarese tan katak nia uza hena hodi kesi tiha nia ulun kanek, hafoin halai ba aldeia ida naran Kukua iha Ermera durante semana ida resin depois maka filafali ba Tibar.

Arguidu David kontinua deklara katak kuandu karta husi tribunál ba ona maka família kontaktu arguidu nune'e arguidu ba entrega-an iha polísia. Arguidu deklara katak nia nu'udar membru artemarsiais korka maibé la tuir treinu so apenas tau naran de'it no arguidu foin primeiravés mai hatan iha tribunál.

Arguidu Jaimito deklara katak iha akontesimentu ne'e arguidu joga hela *bola guling* no rona ema hakilar dehan problema. Arguidu haree nia maun arguidu David nia ulun raan nune'e arguidu halai ba atu ajuda maibé momentu arguidu seidauk to'o hodi ajuda arguidu David, arguidu mós hetan tuda iha parte ulun rezulta kanek no halo arguidu dezmaia. Bainhira arguidu oin mós filafali, arguidu hakfodak tanba rona dehan arguidu Silverio sona ema. Tanba ne'e, arguidu sente ta'uk hodi halai ba subar tiha iha kafé laran.

Arguidu Jaimito hatutan katak iha akontesimentu ne'e arguidu la hamutuk ho arguidu Silverio no arguidu David. Arguidu mós deklara katak nia la oho lezadu Joni no Nilton no la mete arte marsiais ruma.

Arguidu Leandro deklara katak iha akontesimentu ne'e arguidu iha duni fatin futu manu nian maibé nia la envolve iha akontesimentu ne'e. Arguidu mos deklara tan katak nia la envolve iha grupu arte marsiais ruma, maibé derepende de'it polísia sira tau arguidu nia naran tanba ne'e arguidu ba apresenta-an.

Arguidu Eguido da Costa Mendonsa deklara katak iha akontesimentu ne'e arguidu ba duni merkadu, maibé iha dadeer, depoisde arguidu fila tiha ba uma no iha lokraik mak kazu ne'e foin akontese tanba ne'e arguidu laiha koñesimentu kona-ba akontesimentu ne'e. Arguidu mós deklara katak nia la hatene se mak sona no tuda lezadu sira tanba nia laiha fatin akontesimentu. Arguidu deklara liutan katak iha kalan ema ba sunu uma neen iha arguidu sira nia fatin inklui arguidu nia uma no arguidu halai ba subar iha nia alin Jacinto nia uma no arguidu entrega-an ba polísia kuandu arguidu rona katak nia naran mós tama iha lista polísia nian no polísia buka hela tanba ne'e nia ba entrega-an.

Arguidu José da Costa deklara katak la hatene kona-ba akontesimentu ne'e tanba iha loran akontesimentu ne'e arguidu iha nia to'os hamoos hela kafe du'ut iha Aldeia Urema no akontesimentu ne'e iha merkadu Leorema tanba ne'e arguidu la hatene kona-ba akontesimentu ne'e. Arguidu mós deklara katak iha 05 Jullu mak arguidu ho arguidu sira seluk ba entrega-an tanba arguidu nia naran mós iha lista polísia nian.

Arguida Dulcia deklara katak nia la hatene kona-ba akontesimentu ne'e, tanba arguida iha hela nia uma bainhira ema duni malu mak arguida halai ba buka nia oan sira. Arguida mós deklara katak la hatene se mak sona lezadu sira.

Arguidu Caetano deklara katak iha akontesimentu ne'e arguidu ba duni merkadu maibé iha dadeer no fila iha meiudia, nune'e bainhira problema ne'e akontese arguidu iha hela nia uma no dook husi fatin akontesimentu. Tanba ne'e, arguidu la envolve iha kazu ne'e. Arguidu mós deklara katak nia la tuir artemarsiais ruma.

Entretantu, lezadu Germanino Correia deklara katak iha tuku 16:00 lokraik ne'e, mosu duni problema maibé lezadu la hatene se-se mak envolve iha problema maibé derrepente de'it arguidu Silverio lori tudik sona iha lezadu nia liman kabun parte karuk no arguidu Caetano husi kotuk sona tan dala iha lezadu nia kotuk laran rezulta ran sai barak no halo lezadu oin nakukun no monu ba iha rai. Lezadu mós deklara katak Sr. Manuel Gonçalves mak tula lezadu ba ospitál no lezadu baixa durante fulan ida. Lezadu hatutan katak nia nu'udar membru arte marsiais PSHT maibé nia nunka iha problema ho arguidu sira no momentu akontesimentu ne'e arguidu hotu iha fatin akontesimentu, maibé arguidu Silverio no Germanino mak sona lezadu. Entretantu kona-ba lezadu Joni no Nilton ne'ebé mate iha fatin akontesimentu, lezadu la hatene no la haree se mak sona.

Lezadu Adelino Xavier Correia deklara katak lezadu ba merkadu iha tuku 10:00 dadeer to'o tuku 16:00, mosu diskute malu iha futu manu fatin tanba ne'e lezadu husu ba Xefe Suku Leorema, Sr. Almeida atu hakalma tiha problema ne'e, maibé xefe suku hatan ba lezadu katak "*ida mak ó hotu ka?*". Rona xefe suku nia liafuan ne'e, arguidu Caetano, Leandro no Silverio ka'er lezadu riba ba rai no sama tan lezadu. Momentu lezadu hamrik husi rai, arguidu Silverio ho tudik sona iha lezadu nia kotuk laran rezulta kanek no ran sai barak. Lezadu baixa iha ospitál durante fulan ida.

Lezadu Herminio deklara katak iha akontesimentu ne'e, arguidu Leandro tuku dala ida iha lezadu nia matan-fukun rezulta kanek. Arguidu Jaimito tuku dala ida iha lezadu niaibun rezulta kanek. Entretantu arguidu David tuda fatuk kona iha lezadu nia kotuk laran no arguidu Caetano tuda fatuk kona iha lezadu nia kabun rezulta bubu. Lezadu mós deklara katak durante ne'e nia laiha problema ho arguidu sira maibé derrepente de'it arguidu sira tuku no tuda lezadu. Arguidu hatutan katak nia nu'udar membru Persaudaraan Setia Hati Terate (PSHT) maibé nunka buka problema ho arguidu sira.

Testemuña Felix dos Santos nu'udar lezadu Joni no Nilton nia aman boot (matan sorin labele haree) depoimenta katak testemuña ba merkadu iha dadeer to'o lokraik no problema mosu maizumenus iha tuku 16:00 resin no testemuña haree arguidu sira iha hotu fatin akontesimentu husi distánsia maizumenus metru lima. Testemuña haree arguidu David ho arguidu Jaimito halimar hela *bola guling* no sira diskute malu ho lezadu Joni maibé testemuña la hatene diskute malu kona-ba saida no derrepente sira ataka malu. Testemuña depoimenta liutan katak arguidu José lori fatuk tuda uluk hafoin arguidu David baku dala ida ho ai-pedasuk iha lezadu Joni nia kanuruk halo lezadu monu ba rai. Bainhira lezadu Joni

hadeer husi rai, arguida Dulcia husi kotuk hako'ak lezadu nia kanotak halo lezadu book-an la di'ak nune'e arguidu Caetano lori tudik sona lezadu husi kotuk. Testemuña asiste akontesimentu ne'e to'o polisia to'o iha fatin. Testemuña hatutan katak antes ne'e arguidu sira no lezadu sira laiha problema.

Testemuña depoimenta liutan katak sasin la haree ho matan aktu sira hasoru lezadu Nilton, maibé rona tutan husi ema katak arguidu Silverio mak oho. Nune'e mós kona-ba lezadu sira seluk ne'ebé mak kanek, testemuña la hatene. Sasin mós haktuir katak lezadu Joni involve-an iha organizasaun PSHT no arguidu sira involve-an iha KORKA.

### **Alegasaun finál**

Prokuradór haktuir katak arguidu Silverio deklara katak joga hela *bola guling* no bainhira rona barullu mak halai ba fatin akontesimentu. Arguidu Silverio mós konfesa katak nia mak oho duni vítima na'in rua entretantu arguidu sira seluk nega faktu hotu. Maibé iha faktu balun mak kontráriu ba malu, tuir testemuña sira katak arguidu sira diskute malu ho lezadu no problema hahú ho arguidu David ho lezadu Joni Gonçalves dudu malu, maibé tuir arguidu Silveiro nia deklarasaun katak arguidu sona lezadu sira tanba bainhira arguidu faan hela sate iha merkadu, lezadu sira ho grupu ba tuda uluk arguidu no kona iha arguidu nia kanuruk nune'e arguidu lori tudik sona lezadu sira, arguidu Jaimito lori fatuk tuda lezadu Joni, arguidu David lori ai-pedasuk baku lezadu. Bainhira tribunál halo inspesaun ba fatin krime nian mós testemuña sira nafatin konsistente ho sira nia depoimentu.

Arguida Dulcia deskordu ho akuzasaun prokuradór nian katak bainhira nia rona barullu mak arguida halai ba merkadu laran buka nia oan no rezultadu inspesaun hatudu katak liuhusi arguida nia uma foin ba *bola guling*. Arguidu David deklara katak nia laiha fatin akontesimentu, tanba iha dadeer arguidu ba sosa nia oan nia rounpa no lokraik arguidu kesi hela manu no arguidu foin hatene kona-ba akontesimentu ne'e kuandu tribunál halo inspesaun ba fatin akontesimentu no haree fatin kesi manu, *bola guling*, no vítima na'in rua monu besik ho arguidu nia fatin kesi manu. Arguidu Eguido deklara katak nia uma dook husi fatin akontesimentu, testemuña Almerio nu'udar xefi suku iha primeiru interrogatóriu depoimenta katak iha dadeer arguidu Eguido ho lezadu provoka malu ona. Arguidu Caetano deklara katak la involve iha krime ne'e maibé tanbasá mak arguidu ho nia família tenke halai to'o Kukua. Husi arguidu sira hotu nia deklarasaun nota katak atu ses husi akuzasaun.

Alende ne'e, relatóriu médiku hatudu katak lezadu mate tanba hetan pankada no vítima Nilton atu salva nia alin maibé la konsege no nia mós mate iha fatin akontesimentu. Sasin balun dehan dezde Indonezia nia tempu la akontese hanesan ne'e no foin akontese primeiravés. Arguidu Jaimito halai ba subar iha kafé laran, arguidu Caetano ho nia família ba subar iha Kukua no arguidu sira seluk konsentra hamutuk iha Tibar foin entrega-an ba polisia.

Ho faktu sira ne'e, prokuradór konklui katak arguidu sira ko-autór ba krime omisídiu agravadu, tentativa omisídiu simples no arma brankas. Arguidu sira hanesan ko-autór, kada autor ba krime omisídiu rua no tentativa omisídiu tolu, nune'e husu ba tribunál atu kondena kada arguidu ho pena prizaun tinan 20 ba krime omisídiu agravadu, pena prizaun tinan neen

ba krime tentativa omisídiu simples total pena prizaun ba kada arguidu tinan 18. Ba krime arma brankas prokuradór husu pena prizaun tinan haat. Husi total pena sira ne'e, prokuradór husu ba tribunál atu kondena arguidu Silveiro ho pena prizaun tinan 30 no karik tribunál iha hanoin seluk labele menus husi tinan 20. Arguida Dulcia no arguidu José, husu pena prizaun labele menus husi tinan 10. Enkuantu ba arguidu sira seluk prokuradór husu pena prizaun tinan 18.

Entretantu defeza husi arguidu Silverio husu justisa ne'ebé dignu ba arguidu no husu atu haree ba personalidade arguidu nian. Alende ne'e, husu atu halo separasaun ba arguidu Silverio tanba arguidu mantein nia deklarasaun husi primeiru interrogatóriu to'o prosesu komun ida ne'e. Parte defeza dúvida oituan tanba testemuña Felix dos Santos nia matan delek mós bele fiksa ema no testemuña mós rona katak vítima Nilton hetan sona iha kidan.

Defeza husi arguidu na'in neen (David da Conceição, Jaimito da Conceição, Leandro Conceição, Dulcia Andrade, Caetano Martins, Eguido da Costa Mendonça) husu ba tribunál atu absolve arguidu na'in 5 (David da Conceição, Jaimito da Conceição, Leandro Conceição, Dulcia Andrade no Eguido da Costa Mendonça) eseptu arguidu Caetano defeza husu justisa ne'ebé justu, tanba lezadu no testemuña sira nia deklarasaun hamosu dúvida ba defeza. Testemuña sira deklara katak laiha buat ida no derrepente mosu problema no arguidu konfesa ba merkadu sosa nesesidade balun no iha lokraik arguidu hakruk atu kesi manu mak ema tuda arguidu nia ulun no arguidu nia alin Jaimito mak lori ba uma no lori hena kesi nia ulun kanek, arguidu Jaimito deklara katak derrepente ema tuda halo nia monu no bainhira nia hakfodak rona dehan arguidu Silverio mak oho ema. Arguidu José la hatene kona-ba akontesimentu ne'e tanba iha akontesimentu ne'e arguidu hamoos hela kafe du'ut.

Arguida Dulcia iha nia uma tein no rona ema barullu mak halai ba buka nia oan kaduak na'in rua no ba subar iha kafé laran, tanba rona arguidu Silverio mak oho no sona mate lezadu na'in rua.

## **Desizaun**

Depoide avalia faktu hotu tribunál prova katak arguidu Silverio de Deus provadu sona lezadu Joni no Nilton, ba krime sira ne'e tribunál kondena arguidu ba kada krime ho pena prizaun tinan 18. Alende ne'e, arguidu mós provadu nu'udar ko-autór ba krime tentativa omisídiu simples hasoru lezadu Germanino, ba krime ne'e tribunál kondena arguidu ho pena prizaun tinan lima. Pena sira ne'e tribunál akumulasaun hamutuk sai pena mínimu tinan 18 no másimu tinan 41. Bazeia ba akumulasaun pena ne'e, tribunál konklui no kondena pena únika tinan 27 iha prizaun ba arguidu Silverio de Deus.

Arguidu David da Conceição, tribunál prova katak arguidu lori besi baku iha lezadu Nilton nia ulun rezulta kanek, bainhira lezadu atu salva nia maun Joni. Tribunál mós prova katak arguidu tuda fatuk kona iha lezadu Herminio nia kotuk laran rezulta bubu no kanek. Ho faktu sira provadu ne'e, tribunál konsidera arguidu nu'udar ko-autór ba krime omisídiu agravadu hasoru lezadu Nilton no kondena arguidu ho pena prizaun tinan 15 no ko-autór mós ba krime tentativa omisídiu simples hasoru lezadu Herminio no kondena arguidu ho pena prizaun tinan lima. Husi pena sira ne'e, tribunál akumulasaun hamutuk sai pena mínimu tinan lima prizaun

no másimu tinan 20 prizaun. Bazeia ba akomulasaun pena ne'e, tribunál konklui no kondena arguidu David da Conceição ho pena únika tinan 17 iha prizaun.

Arguidu Jaimito da Conceição tribunál prova katak arguidu hamutuk ho arguidu sira seluk tuku lezadu Nilton bainhira lezadu atu ba salva nia maun Joni. Tribunál mós prova katak arguidu ho tudik sona lezadu Nilton nia kotuk laran rezulta lezadu Nilton mate iha fatin akontesimentu. Ba aktu ne'e tribunál kondena arguidu ho pena prizaun tinan 15 prizaun. Tribunál mós prova katak arguidu Jaimito da Conceição provadu hanesan ko-autór ba krime omisídiu agravadu hasoru lezadu Joni ho pena prizaun tinan 15 no ko-autór ba krime tentativa omisídiu simples ba lezadu Herminio ho pena prizaun tinan lima, tribunál akumula hamutuk sai pena mínimu tinan 15 prizaun no másimu tinan 20 prizaun. Bazeia ba akomulasaun pena ne'e, tribunál konklui no kondena arguidu Jaimito da Conceição ho pena únika tinan 17 iha prizaun.

Arguidu Leandro da Conceição, tribunál prova katak arguidu provadu komete krime omisídiu agravadu hasoru lezadu Joni no tribunál kondena arguidu ho pena prizaun tinan 15. Tribunál mós prova katak arguidu tenta atu oho lezadu Adriano (tentativa omisídiu simples) no ba krime ne'e tribunál kondena arguidu ho pena prizaun tinan lima fulan lima. Husi pena ba krime rua ne'e, tribunál halo akumulusaun no kondena arguidu ho pena únika tinan 18 iha prizaun.

Arguida Dulcia Andrade, tribunál prova nu'udar ko-autór ba krime omisídiu agravadu hasoru lezadu Nilton tanba arguida husi kotuk hako'ak metin lezadu Nilton nune'e fo biban ba arguidu sira seluk sona lezadu rezulta lezadu mate iha fatin akontesimentu. Bazeia ba faktu provadu ne'e tribunál konklui no kondena arguidu ho pena prizaun tinan 15.

Arguidu Caetano Martins, tribunál prova hanesan ko-autór ba iha krime omisídiu agravadu hasoru lezadu Nilton no ba krime ne'e tribunál kondena ho pena prizaun tinan 15. Entretantu ba krime tentativa omisídiu simples hasoru lezadu Adelino, tribunál aplika tinan lima prizaun no krime arma brankas tribunál aplika tinan lima prizaun. Husi pena sira ne'e, tribunál halo akumulusaun no konklui hodi kondena arguidu ho pena únika tinan 20 prizaun ba arguidu.

Arguidu Eguido da Costa Mendonça, tribunál prova nu'udar ko-autór material ba krime omisídiu agravadu hasoru lezadu Joni, ba krime ne'e tribunál aplika pena prizaun tinan 15. Tribunál mós prova arguidu nu'udar ko-autór material ba krime tentativa omisídiu simples hasoru lezadu Adelino, ba krime ne'e tribunál aplika pena prizaun tinan lima. Entretantu ba krime arma brankas tribunál aplika pena prizaun tinan lima. Husi pena sira ne'e hotu, tribunál halo akumulasaun no kondena arguidu ho pena únika tinan 20 prizaun.

Enkuantu ba arguidu José da Costa, tribunál prova katak arguidu nu'udar ko-autór ba krime omisídiu agravadu hasoru lezadu Joni tanba hafoin arguidu sira seluk sona lezadu Joni, arguidu tuda fatuk kona iha lezadu nia ulun rezulta lezadu nia ulun kanek ran sai no mate iha fatin akontesimentu. Ba krime ne'e, tribunál kondena arguidu ho pena prizaun tinan 15.

## **10. Krime abuzu seksuál ba menór**

Nú. Prosesu : 0100/19.PCCIC  
Kompozisaun Tribunál : Koletivu  
Juis : Dra. Ana Paula Fonseca, Dra. Maria Solana d. Conceição no  
Dr. Ivan S. P. A. Gonçalves  
Prokuradór : Dra. Benvinda do Rosario  
Defeza : Dr. Manuel Tilman  
Desizaun : Pena prizaun tinan 15

Iha 24 Agostu 2020, Tribunál Distritál Dili prezide julgamentu leitura akordaun ba krime abuzu seksuál ba menór ho agravasaun ne'ebé envolve arguidu AQ hasoru lezada ho idade menoridade, tinan 13, iha Distritu Dili.

### **Akuzasaun Prokuradór**

Prokuradór akuza katak iha data ne'ebé la apura maibé iha tinan 2019 iha dadeer, lezada no arguidu hasoru-malu bainhira lezada lori paun ba faan iha dalan, iha área Menleuana. Arguidu bolu lezada no ko'alia ba lezada dehan "*mai ita na'in rua namora.*" Maibé lezada la hatan buat ida. Arguidu hakbesik-an ba lezada no ameasa lezada dehan "*ó lakohi, ha'u hetan ó iha dalan ha'u baku mate ó.*" Depoide ameasa tiha lezada, arguidu la'o tiha no lezada kontinua faan paun. Maibé iha kalan, kuandu lezada ba iha nia tiu (J) nia uma ne'ebé besik mós ho lezada nia uma, lezada haree hetan arguidu iha portaun oin enkuantu tudik ida iha nia liman. Arguidu ko'alia ba lezada dehan "*ó lori tiha hahan ba mak mai fali.*" Tanba ta'uk, lezada mós halo tuir saida mak arguidu koa'lia, nune'e lezada sai fali husi nia tiu nia uma.

Bainhira lezada sai husi ne'ebá, arguidu ne'ebé hamrik iha nakukun laran bolu kedas lezada atu sae nia motor. Lezada mós sae duni arguidu nia motor no arguidu lori lezada ba iha rai fuik ida iha área Bemauk-Manleuana. Iha ne'ebá arguidu obriga kolu lezada nian roupa no halo relasaun seksuál ho lezada. Hafoin ne'e, arguidu tula fali lezada ba nia uma iha tuku 22:00 kalan. Lezada nia família sira husu litik lezada hafoin lezada konta sai akontesimentu ne'e. Antes ne'e, arguidu halo bebeik ona hahalok hanesan ne'e hasoru lezada maibé lezada la ko'alia sai tanba ta'uk arguidu nia ameasa atu soke mate lezada kuandu lakohi halo relasaun seksuál ho arguidu.

Prokuradór akuza arguidu kontra artigu 177 KP kona-ba abuzu seksuál ba menór ho moldura penál tinan 5 to'o15 prizaun.

### **Produsaun ba prova sira**

Iha prosesu julgamentu, arguidu delara katak halo duni relasaun seksuál ho lezada hamutuk dala haat maibé haluha lora akontesimentu. Relasaun primeiru akontese iha arguidu nia uma baihira arguidu nia feen laiha uma. Arguidu mós deklara katak nia nunca ameasa lezada tanba relasaun seksuál ne'e akontese tanba sira hakarak ho hakarak. Arguidu koñese lezada tanba arguidu kolega ho lezada nia maun sira. Arguidu haktuir katak nia la hatene lezada nia idade menoridade tanba físicamente lezada hanesan ema bo'ot.

Entretantu lezada kontinua konfirma faktu sira hotu iha akuzasaun no deklara katak lezada la koñese arguidu no sira laiha relasaun namora. Lezada hatutan katak arguidu komete ninia hahalok ne'e dala lima maibé lezada haluha ona data akontesimentu.

Testemuña MP nu'udar lezada nia avó depoimenta katak iha tuku 21:00 kalan, testemuña ho família hotu buka lezada tanba laiha uma no bainhira lezada fila ba uma, testemuña no família sira seluk husu lezada fila husi ne'ebé no tanba ta'uk lezada lakohi ko'alia. Tanba ne'e, lezada nia tiu baku lezada hafoin lezada konta hotu saida mak arguidu halo ba lezada. Rona hotu tiha akontesimentu ne'e, família sira ba hato'o keixa iha polísia.

### **Alegasaun finál**

Prokuradór konsidera arguidu provadu komete krimé abuzu seksuál hasoru lezada ho idade menoridade hamutuk dala haat maibé tuir deklarasaun lezada nian arguidu halo relasaun seksuál ho lezada dala lima. Nune'e haree ba pena ne'e ninia moldura, husu ba tribunál atu kondena arguidu ho pena tinan 20 ne'ebé mai husi pena tinan lima ba kada akontesimentu.

Defeza haktuir katak relasaun seksuál entre arguidu no lezada tanba konsentimentu husi parte rua. Alende ne'e, arguidu nia hanoin lezada la'os menoridade ona tanba físikamente lezada hanesan ema bo'ot. Tanba ne'e, husu ba tribunál atu kondena arguidu ho pena prizaun tinan lima.

### **Desizaun**

Depoide avalia faktu hotu, tribunál prova katak arguidu komete duni abuzu seksuál hasoru lezada ne'ebé ho idade menoridade. Arguidu ninia hahalok ne'e halo lezada lakon nia virgen tuir relatóriu médiku. Bazeia ba faktu provadu sira ne'e no tetu sirkunstánsia sira hotu, tribunál kondena arguidu ba kada krime (krime konkursu dala lima) ho pena prizaun tinan 10 nune'e hamutuk pena tinan 50. Husi pena sira ne'e, tribunál halo akumulasaun no konklui kondena arguidu ho pena únika tinan 15 iha prizaun.

Atu hetan informasaun kle'an liután favor kontaktu:

Ana Paula Marçal

Diretora Ezekutiva JSMP

Telefone: 3323883/77040735

Diresaun e-mail: [ana@jsmp.tl](mailto:ana@jsmp.tl)

[info@jsmp.tl](mailto:info@jsmp.tl)

Website: <http://jsmp.tl>